

萬 有 文 庫

第二集七百種

王 雲 五 主 編

明 文 在
(二)

薛 熙 纂

商務印書館發行

明 文 在
(二)

薛 熙 纂

國 學 基 本 叢 書

明文在卷十一

律詩

過戴居士宅

高 啓

江邊戴顓宅。地好愜幽尋。高樹藏卑屋。新篁補舊林。鳥成留客語。雲作護花陰。不負滄洲約。重來論夙心。

報恩寺逢蔣主簿就送還如皋

高 啓

貪語酒寒頻。新年見故人。別時煙寺晚。歸路雪江春。造次燈前面。蒼茫舶上身。明朝楚花發。莫歎縣廚貧。

臨頓里

高 啓

聞說橋東地。高人舊隱居。養生應有道。覓舉絕無書。愛救黏絲蝶。噴驚出水魚。時尋戴顓宅。自駕短轅車。應愛山齋好。秋風不捲茅。鑿渠侵蝟穴。移樹帶禽巢。人世真浮梗。吾生豈繫匏。不逢皮從事。誰結歲寒交。載酒攜山榼。安琴製石牀。晁眠皆傍母。蜂去自從王。穀雨收茶早。梅天晒藥忙。不扶靈壽杖。筋力老能強。自少圖名意。誰言世不知。僧求開寺記。客送買山資。細雨魚生子。斜陽燕哺兒。平生無事迫。心苦爲尋詩。斬伐憑樵斧。經綸在釣車。薄雲還露月。小雨不妨花。酒債應多處。詩名自一家。虛煩明主召。懶脫故衣麻。長物原無有。何勞犬護扉。借看高士傳。學製道人衣。窗破容螢入。船空載鶴歸。定緣幽事繞。不是宦情微。澹泊心情在。蕭疎鬢影殘。引泉規作沼。留筍待成竿。自洗沾泥屐。誰收挂壁冠。毛公新有約。月夜禮天壇。沐罷便輕幘。消搖詠晚天。清風蘇病鶴。驟雨集鳴蟬。舊史堆湘素。新經錄洞玄。誰知城郭裏。別自有林泉。

汨汨泉通圃。蕭蕭柳映門。折花搖樹影。踏藕損蓮根。饑鴨呼歸艦。新鷺試浴盆。屋前高石在。知是鬱林孫。
茶租催未得。菊餌服還能。行古時人笑。文工造化憎。貧留漁艇載。老謝鶴書徵。誰識先生樂。悠然臥枕肱。

雪夜宿翰林院呈危宋二院長

高 啓

偶伴王摩詰。寒宵宿禁林。院鈴風外靜。宮漏雪中沈。絳蠟銷吟燭。青綾擁賜衾。明軼陪賀瑞。銀闕曉光深。

謝賜衣

高 啓

臚呼遙捧賜。拜服望蓬萊。香帶爐煙下。光迎扇月開。奇文天女織。新樣內宮裁。被澤徒深厚。慚無奪錦才。

春日退直呈禁署諸公

高 啓

待詔直東華。歸休每日斜。職連詞客苑。俸入酒胡家。簷網長縈絮。庭輒欲過花。知君未出院。應草侍中麻。

寓天界寺

高 啓

雨過帝城頭。香凝佛界幽。果園春乳雀。花殿午鳴鳩。萬履隨鐘集。千燈入鏡流。禪居容旅跡。不覺久淹留。

宴王將軍第

高 啓

流水通侯第。行雲傍妓臺。雨催牙仗散。風引羽觴來。曲學移聲按。詩隨得韻裁。莫令遊宴歇。次第過花開。

諫柳

高 啓

何恨苦長鋏。纖腰嫵媚春。慣愁行路客。羞比舞筵人。亂葉斜斜雨。狂花裊裊塵。殘蟬來噪日。應落漢潭濱。

京師寓廡

高 啓

誰言舊隱非。靜里且相依。綠樹城通苑。青山寺對扉。官閑休直早。客久夢還稀。是物春來典。惟存舊賜衣。

寂寞過芳時。幽懷只自知。袖無投相刺。篋有寄僧詩。鼠跡塵凝帳。蛙聲雨到池。疏慵堪置散。不敢怨名卑。
送宿衛將出守鄧州

高 啓

中郎身領仗宿衛。在承明。舊射雙雕落。新乘五馬行。紅雲遙魏闕。白水近穰城。好勸諸年少。春來賣劍畊。
冬至夜喜逢徐七

高 啓

君來同客館。把酒夜相看。動是經年別。能辭盡夕歡。雪明窗促曙。陽復座銷寒。世路今如此。懸知後會難。
送陳則

高 啓

挾策去誰親。侯門不禮賓。愁邊長夜雨。夢裏少年春。樹引離鄉路。花驕失意人。一杯歌短調。相送欲沾巾。
送錢氏兩甥度嶺

高 啓

吏送投荒去。應歸下瀨營。一家十口散。萬里兩身行。洞獠欺商市。山魃喚客名。江邊南望泣。不盡渭陽情。
答宗人廉夜飲王氏池亭見懷

高 啓

遙聞池上酌。涼夜失炎天。酒碧傾當竹。衣香坐近蓮。沿波人弄月。翻樹鳥鳴煙。座上誰相憶。唯應是惠連。
郊墅雜賦

高 啓

江水舍西東。鄰家是釣翁。路痕深草沒。井脈暗潮通。籬隔蔬邊雨。門開竹下風。不因時賣畚。何事入城中。
此鄉堪避地。亂後戶翻增。俗美嫌欺客。年豐愛施僧。帶星畊處輓。照雪紡時燈。且作求田計。元龍豈我能。
幽事向誰誇。孤吟對晚沙。浣衣江動月。繫艇岸垂花。行蟻如知路。歸鳧自識家。一尊茅屋底。隨意答春華。
春泥桑下路。孤策自扶行。身賤知農事。心閑見物情。魚鳴風欲起。牛飯月初生。漸喜無人識。何煩易姓名。

移家到渚濱。沙鳥便相親。地僻偏容嬾。邨荒卻稱貧。犬隨春餽女。雞喚曉畊人。願得無愁事。閒眠老此身。
紛紛謝人役。寂寂戀吾居。細雨春零後。斜陽社飲餘。岸花飛趁蝶。池葉墮驚魚。好了公家事。休令吏到廬。
路迂橋斷處。門靜犢眠時。孤墅藏羣柳。諸田灌一陂。僮閒春作少。婦嬾午炊遲。誰道花源好。還令太守知。
虛閣近鳴湍。應宜把一竿。雨傷春麥爛。風折晚蒲乾。抱甕臨江汲。攜書入寺看。自慚吾獨幸。世難此偷安。
亂渚交交白。平蕪漫漫青。賣薪沙店遠。祈穀水祠靈。密雨侵蓑重。微風過網腥。江邊多酒伴。春去不曾醒。
入夜潮侵戶。經秋雨壞垣。里人淳少訟。田父醉多言。稻蟹燈前聚。莎蟲機下喧。自應耽野趣。不是忘鄉園。
欲沽嗟市遠。煙火隔江波。客到寒齋少。人歸晚渡多。汗書燈燼落。驚枕櫓聲過。豈敢愁荒寂。時危免負戈。
野色迴蒼蒼。開門葉滿塘。僧來雙屐雨。漁臥一船霜。靜裏脩香傳。閒中錄酒方。平生當世意。到此坐成忘。
紅樹江南近。青山北郭遙。江清目渺渺。林冷髮蕭蕭。食鱸知晨釣。聽歌識暮樵。尋常送歸客。不過水西橋。
何處可徘徊。林間共水隈。夜歸家犬識。春睡野禽催。有地惟栽藥。無邨不見梅。興來慚獨飲。時喚老農陪。
狂多愛出遊。日日問江頭。小草皆春意。遙山自晚愁。酒中時有得。物外復何求。不詠騷人調。靡無任滿洲。
居似臨邛宅。畊非鄠杜田。已償輸稅米。未覓賣文錢。把卷憐長日。看花愧少年。翛然閉門處。楊柳桔槔邊。

八月十三夜與文濟時範質甫城西泛舟達秦淮

顧璘

落日清川裏。輕風已自涼。秋懷生白舫。山翠撲胡牀。問路疑天上。停杯待月光。何人橫鐵笛。吹過斗牛傍。
六代煙華地。狂歌待夜游。山河橫王氣。水月弄清秋。木落長千寺。雲殘太白樓。共君須痛飲。沈醉傍滄洲。

贈子魚

顧璘

與子三年別。重來鬢已蒼。論心風雨夕。下榻水雲鄉。畫閣燈花煥。秋杯竹葉涼。慙慙行止意。相對兩彷徨。
隱吏亭雜詩

顧璉

卷幔青山入。拋書白日長。苔茵承屐穩。竹粉惹衣香。病喜鶯禽戲。貧嗔減鶴糧。自堪稱隱吏。不用問行藏。
春日與張萬里城南訪阮仁卿

顧璉

春事已如此。郊行亦偶然。芳筵甘野蔌。輕服快晴天。谷靜聞流水。江寒起暮煙。病軀登頓倦。藉草卽思眠。
王司訓聰投詩見訪不值

顧璉

閉戶妨迎客。空勞枉駕過。清詩充謁刺。塵榻愧行窩。世久輕魚服。君能問雀羅。無由挽高躅。日暮碧雲多。
聞方伯彭公薦刻

陳憲章

當時尊孔孟。用世必詩書。夫我何爲者。先生非過歟。長歌扶晚醉。短髮向秋疎。坐惜籬前水。持竿試釣魚。
晚步

陳憲章

水國秋先至。江邨晚更幽。泥筌收郭索。山網落鉤輅。涼入社門樹。陰連渡口舟。獨憐經略地。吾得放歌遊。
喜梁冠文至

陳憲章

駐槳梅邨夜。風光勝早春。直知花是路。不覺月隨身。草木皆知舊。江湖多賤貧。短蓑來往數。等是最閑人。
三竺道中

邵寶

人行松徑靜。數里不知遙。路轉還逢寺。僧迎只過橋。巖姿收獨妙。泉響息羣囂。東去頻回首。山花似我邀。
殘雪

楊循吉

殘雪經時久。常聞簷溜聲。謂晴堦又濕。疑雨日還明。地背融偏後。宵寒凍復成。不妨留莫汴。借爾照書楹。

旦公往寶積寺

楊循吉

古廟石湖邊。爲僧今幾年。開堂小游戲。出世大因緣。生死一夢耳。江山常熾然。遙知末句子。不肯向人傳。

送春

桑悅

年換朱顏去。春拋綠酒歸。孤身類蓬轉。老眼看花飛。愁裏成新詠。閒中簡舊非。丁寧初夏雨。好長故山薇。

水南絳帳

魏時敏

故老傳經日。諸生立雪時。瓶香人送酒。門響客催詩。白髮經秋短。青燈坐夜遲。河汾有遺稿。讀罷一興思。

在武昌作

徐禎卿

洞庭葉未下。瀟湘秋欲生。高齋今夜雨。獨臥武昌城。重以桑梓念。淒其江漢情。不知天外雁。何事樂南征。

虎邱退居集友人

蔡羽

檻外斜吳苑。林間促羽觴。池花搖暑淨。泉韻雜松涼。念別經時久。重來笑客忙。小吳軒裏月。臨發戀清光。

早春繁臺

李夢陽

泯泯春猶早。行行賞不違。柳黃沙際見。草色雪中歸。積水生雲氣。孤城下夕暉。誰禁臺寺望。北雁又將飛。

次陽邏堡

程誥

征騎晚駸駸。陂湖驛路侵。見山思隱計。投館得歸心。市近春風軟。江遙暮雨深。提壺問邨酒。誰惜解囊金。

過李氏莊

鄭作

沙徑縈村入。柴門面水開。園林君自得。鞍馬我能來。白鷺窺魚立。黃鶯觸燕回。日斜猶不去。相與坐莓苔。

九日同馬君卿任宏器登高

何景明

歲歲重陽菊。開時不在家。那知今日酒。纔對故園花。野靜雲依樹。天寒雁聚沙。登臨無限意。何處望京華。

重游蕭氏園

薛蕙

別此真如昨。重游換物華。粉滋曾倚竹。紅淺舊看花。沙阪縈林曲。山籬逐水斜。城南咫尺路。未覺往來賒。

西湖

孫一元

十里山如拭。西湖背郭流。僧歸虹外雨。雲抱水邊樓。春事多逢醉。歌聲半是愁。獨憐垂釣者。吾欲共滄洲。

哭張士孚

鄭善夫

同舍今何在。斯人天下無。感時看諫草。何日奠生芻。狐鼠私相慶。衣冠勢益孤。空餘青史上。遺簡載名儒。

溪行呈元之族祖

汪本

雨濯山光潤。風吹溪響清。有懷成遠詠。無伴趁幽行。野草不媚世。沙鷗寧近名。歸來臥松石。新月西林生。

王昭君

蔣山卿

拭淚新裝束。朝來殿裏辭。何堪辭訣日。卻是見憐時。漢騎臨關少。胡笳出塞遲。琵琶寫哀怨。淒切轉添悲。

宋玉

楊慎

文藻三閭並。幽懷九辯知。雲爲巫峽賦。雪作郢中詞。茅屋還遺址。蘭臺異昔時。鴻裁誰獵艷。空自拾江蘼。

病中送人入陝

韓邦靖

渭水潼關北。吾親舍在茲。君行須此路。我往未知期。但報平安日。休言疾病時。丈夫憐少子。恐遣鬢成絲。

聞雁

韓邦靖

鳴雁蕭蕭下。寒燈故故明。角聲傳細雨。雲色渡高城。兄弟無書信。乾坤有甲兵。秋風歸未得。見爾不無情。

芭蕉園

馬汝驥

輦道山樓直。宮園水殿低。碧荷春檻出。紅藥晚階齊。釣石蛟龍隱。歌臺鳥雀啼。翠華當日幸。花木五雲迷。

山居

李鳴鶴

石壁日初上。春山風乍晴。偶隨黃犢出。閒傍綠溪行。幽鳥淡無語。落花亂有聲。迴看飛瀑下。樹杪白雲生。

虎邱寺看妓人走馬

王穉登

駿馬龍駒種。佳人燕子身。馳驅下夕坂。險絕太驚人。血是蹶間汗。香爲鬢裏塵。解鞍慵不語。游子替傷神。

看梅過玄墓山中

王穉登

人似梅花瘦。舟如蘭葉長。青山十畝白。流水一春香。種密人難入。開齊夜有光。苔枝容我折。野老不嗔狂。橋外花開日。分明雪作圖。不將他樹雜。未有一家無。多處半青嶂。香時過太湖。濁醪元易得。市遠亦須沽。

紫陽庵丁真人祠

王穉登

丹壑斷人行。琪花洞裏生。亂崖兼地破。羣象逐峯成。一石一雲氣。無松無水聲。丁生化鶴處。蛻骨不勝情。

明文在卷十二

律詩

元日早朝

李東陽

九門深掩禁城春。香霧籠街不動塵。玉帳寒更傳虎衛。彤樓曉色聽雞人。簾前樂應紅燈起。階下班隨綵仗陳。朝散東華看霽日。午煙晴市一時新。

郊祀喜晴有述

李東陽

碧消煙盡露華凝。目極瑤臺第九層。清珮緩隨馳道月。絳籠高應午門燈。風傳廣樂聲初下。天近燔柴氣已升。人意可占神意悅。萬年靈祚永堪膺。

十八日聽傳臚有作

李東陽

金蓮影與赭袍明。華蓋前頭次第行。黃紙數行丹詔字。鴻臚三唱甲科名。雲邊曉日中天見。夢裏春雷昨夜聲。歸向長安聽人語。聖朝羅網盡豪英。

十九日恩榮宴席上作

李東陽

隊舞花簪送酒頻。清朝盛事及嘉辰。星辰畫下尙書履。風日晴宜進士巾。圍撤漢科三日戰。苑看唐樹九回春。丹心未老將頭白。猶是當年獻策身。

九峯書屋和曹時和韻

李東陽

江上草亭新卜築。已聞揚子著書成。每逢社日聊隨俗。久住青山卻有情。霜入晚松經歲老。雨繁春筍過鄰生。小堂若許臨江閣。杖履無煩匹馬迎。

春興

李東陽

六年書詔掌泥封。紫閣春深近九重。階日煥思吟芍藥。水風香憶種芙蓉。登臺未買千金駿。補袞難成五色龍。身病益愁愁轉病。老來歸思十分濃。

予素不善飲。文明詩來有西涯爛醉欲人扶之句。且以二尊見惠。步韻答之。

李東陽

夢斷高陽舊酒徒。坐驚神語落虛無。若教對飲應差勝。縱使微醺不用扶。往事分明成一笑。遠情珍重得雙壺。次公亦是醒狂客。幸未粗豪比灌夫。

少保商先生壽七十

李東陽

白頭歸老荷君恩。一代勳名衆所尊。自古年華稀七袞。本朝科甲重三元。海中仙子長生籙。洛下先生獨樂園。怪見台光映東壁。郎官又侍紫微垣。

哭商懋衡侍講

李東陽

科甲文章有父風。詞林接武更誰同。講經春殿爐煙煥。校藝秋闈燭影紅。門閥並高緣有弟。頭顱未白早稱翁。生平五十還非夭。不道人間是夢中。

和武季丈早春游宴

張泰

日滿寒塘冰漸開。細泉聲裏覺春來。物華天與新雙眼。酒量吾應長一杯。野色放青回凍草。暗香凝雪上

晴梅病軀方藉風光慰。敢問朝簪染素埃。

自詠

王越

自歎儒官拜將官。談兵容易用兵難。世間惟有征夫苦。天下無如邊地寒。鬢爲胡笳吹作雪。心經烽火煉成丹。朝廷公道明如日。俯仰無慙處處安。

早朝奉天殿

魏觀

旭日瞳瞳啓奉天。百僚雲萃武樓前。青松綴玉傳甘露。紫筍浮花淪醴泉。多士聽宣魚貫入。諸侯分直雁行聯。白頭謬忝儒紳後。大本先容赴講筵。

大本堂

魏觀

六齋帝子聯龍袞。三島神仙列雁行。繡轂青鸞金羽蓋。錦韉白馬紫遊韁。御溝細柳雲生暝。禁籞飛花雨送涼。鄭國書聞能一一。玉爐清晝爲分香。

鄭國公常茂等授經大本堂

魏觀

鄭國新侯弟子羣。儲闈時得奉殷勤。宮花細浥研朱露。禁柳微濺洒墨雲。御氣日從雙闕望。書聲時徹九重聞。楚王可是推仁愛。臨帖常容半席分。

舊大本堂

魏觀

玉署儲書紫禁東。宛然麟鳳穆清風。雲開奎壁天光合。日射蓬萊御氣通。炬炳蓮花歸學士。燈然藜杖致仙翁。觴吳宋樂皆時彥。譔述承恩晝夜同。

送編脩張仲藻還家畢姻

宋 濂

少年歸娶奏金鑾。喜得天顏一笑看。紅錦裁雲朝奠雁。紫簫吹月夜乘鸞。靈椿堂上承中饋。寶鏡臺前結合歡。從此梅花消息好。青綾不似玉堂寒。

次韻答上清道士

王 禕

山中一別五經春。近得詩篇意度新。文字須爲方外友。神仙元是世間人。洞雲玄虎司丹室。壇月青鸞禮玉宸。坐對匡廬秋色好。欲將寄遠苦無因。

桐廬舟中

王 禕

瀟洒溪山夢此邦。輕風細雨過桐江。川迴幾訝船無路。林缺時看屋有窗。野果青苞垂箇箇。水禽白羽去雙雙。到家會值重陽節。新釀邨醪正滿缸。

長蘆渡江往金陵

張以寧

春日三竿上翠屏。曉風五兩下蘆汀。水兼天去無邊白。山過江來不斷青。沙鷺潮迴平雁跡。海門雨至帶龍腥。昇平不復後庭曲。睡起漁歌爛漫聽。

喜丁仲容徵君至

張以寧

題詩苦憶城南郭。喜見歸來鶴姓丁。雙鬢野風吹汝白。一燈江雨向人青。志士長嗟靈壽杖。史官獨失少微星。瓊花照眼春無賴。明日酌君雙玉瓶。

半年學稼入田中。時訪邨西鶴髮翁。草徑喫煙晨放犢。篷窗秋雨夜聞鴻。瓜香果熟園林趣。酒濁雞肥里社風。野鳥不知興廢事。爭枝擇樹滿林同。

故里初歸整頓中。草堂欲學浣花翁。芳尊酒熟濃浮蟻。老眼詩成遠送鴻。晚節半籬黃菊露。秋聲一榻碧梧風。於今只有樵山在。暮景何妨事事同。

霍元方辭訓導之職來歸東崖故居再用前韻賀之

宋 訥

舊隱高崖曲岸中。療饑歸作採芝翁。無人徑造依亭竹。有子書追戲海鴻。門外小船漁笛月。籬東矮屋酒旗風。先生襟韻知何似。秋菊春蘭臭味同。

歸來卽事再用前韻寄霍東崖

宋 訥

田園兵後草萊中。未要忘機論海翁。茅屋四隣羅鳥雀。蕪詞一紙託鱗鴻。蠶桑雞黍家家事。燕麥鳧葵處處風。何日相期歸舊隱。水邊林下著參同。

仲春遊望

張 羽

春來結伴共閒行。此日山川色更明。望裏樓臺多見柳。靜中阡陌但聞鶯。江蘼色帶王孫恨。蜀魄吟傷帝子情。莫道韶華鎮長在。落花看已滿東城。

川上暮歸

張 羽

此地頻經畫舫過。暮歸原不畏風波。煙中漁網懸楊柳。浦口船燈照芰荷。歸鳥去邊行客少。夕陽盡處亂山多。此時詩思渾無賴。聽得前溪子夜歌。

行樂過西崦

張羽

白日都消筆硯間。偶因行樂到松關。秋聲不盡蕭蕭葉。夕景無多淡淡山。蛩響寒齋僧自定。苔荒深院客常閒。已知身世俱成幻。莫歎西風鬢易斑。

寄王止仲高季迪

張羽

祇恨孤城未解圍。園開番遣別相知。夕陽江上匆匆酒。細雨燈前草草詩。有夢直從花落後。無書空過雁來時。郭西古寺題名處。今日重遊卻共誰。

訪王子讓大村幽居借書戲題壁間

劉崧

邨前流水宛如環。邨後荒城隱可攀。當戶雨苔雙石峻。隔江煙柳數峯閒。杖藜麥隴秋霜後。尊酒茅堂夕照間。聞有古書人少見。柴門客去又長關。

送蓮社陸道師歸鏡湖

劉崧

一錫橫飛下鏡湖。頭顱老去世緣疏。庭栽竹少堪容鶴。池種蓮多不礙魚。滿室香雲經盡後。半窗明月定回初。陶潛嬾入東林社。在在青山可結廬。

寄萊州太守趙圭玉

劉崧

憶在兵曹三四年。君留東署我西偏。檢書清夜然官燭。沽酒常時數俸錢。借馬獨行緣送客。聞雞相喚去朝天。論交亦有胡兼許。此日天涯各惘然。

次高二季迪留別韻

徐賁

柴門邛徑帶溪橋。來往因君豈憚遙。淺水不波仍漾漾。疏林無雨自蕭蕭。橋留夕照人將別。江作新寒酒易消。明日秋風重悵望。還將離思託歸潮。

寫韻軒

朱夢炎

掌籍江河誤泄飢。幾年謫降學書癡。晴窗滴露花搖席。午夜揮毫月滿帷。綰得春風留鳳帶。畫殘秋水照蛾眉。從今了卻人間事。一曲鸞簫跨虎吹。

擬唐宮詞

蘇伯衡

紫禁迢迢宮漏鳴。夜深無語獨含情。春風鸞鏡愁中影。明月羊車夢裏聲。塵暗玉階綦跡斷。香飄金屋篆煙清。貞心一任蛾眉妬。買賦何須問長卿。

唐伯庸以詩謝作讀書林記次韻答之

趙沆

纏居原不見紛華。矮屋疏籬只一家。雪後松筠初換葉。春深桃李自開花。讀殘青竹無人到。覽罷黃庭已日斜。此道已來成寂寞。似君端合向人誇。

次韻酬黎以德

梁寅

銀河斜界樹參天。爲憶幽人思渺然。亥市塵囂迂竹徑。午橋煙雨傍溪船。明燈散帙栖鴉後。倚杖看山去鳥邊。但得文章攀屈宋。何須重賦遠遊篇。

都下將歸宿石城門外和李仲淵晚過上林之作

梁寅

韋曲風光尺五天。驕嘶過酒樓前。龍輿陌路疏疏雨。鳳闕觚稜淡淡煙。上相彩旂歸柳外。王孫金彈落